



Nicolaus ex nobili familia Poluilorum natus, & honestè educatus fuit. quamprimùm is adoleuisset, Caroli Cæsaris castra hinc inde sequi cœpit. erat enim insigni corporis & animi fortitudine præditus, præterea rara prudentia insignis. Itaq; breui factum, ut magnam militiæ laudem sibi compararit. Id cum Carolus Imperator intellexisset, eum ex nobili tantùm milite baronem constituit, ac multis opibus exornauit. Cum etiam ei strenuam operam in bello Smalkaldico nauasset, et ordines duxisset, Ferdinandus rex eum Constantiæ primum præfectum constituit, cum ea ciuitas id. Octob. 1548 ob metum Cæsaris sese sponte Austria

cis subiecisset. In eo loco cum per aliquot annos suam authoritatem declarasset, atq; omnia commodè disposuisset, à Ferdinando rege ad maiora reuocatur. Tum enim Turca denuò cœperat fines Austriacos diripere, & pacis limites transilire. Itaq; Poluilerus anno 1556 cum iusto exercitu equitum & peditū in Vngariam missus fuit.